

Prvi zamjenik visokog predstavnika Scanlan: Bijeljina služi kao primjer razvoja privatnog sektora i društvene tolerancije



Prvi zamjenik visokog predstavnika i supervizor za Brčko Michael Scanlan jučer je prvi put boravio u službenoj posjeti Bijeljini. Tokom posjete, prvi zamjenik visokog predstavnika se sastao sa gradskim zvaničnicima, gradonačelnikom Mićom Mićićem, predsjednikom Skupštine Grada Slavišom Markovićem, te potpredsjednikom Skupštine Mustafom Gradašćevićem. Također se sastao sa predstavnicima vjerskih zajednica, episkopom zborničko-tuzlanskim Fotijem i glavnim imamom Medžlisa Islamske zajednice Bijeljina Samirom Camićem.

Prvi zamjenik visokog predstavnika Scanlan informirao se o socioekonomskim prilikama u Bijeljini, sa posebnim naglaskom na naporima koje lokalne vlasti ulažu kako bi odgovorile na svakodnevne potrebe građana, posebno u kontekstu javnih usluga i prilika za razvoj privatnog sektora koji će stvoriti nova radna mjesta.

„Bijeljina mi se čini kao dinamična zajednica koja je posvećena ekonomskom razvoju i privlačenju investicija, kako domaćih tako i stranih,“ rekao je Scanlan. „Imao sam priliku čuti o nastojanjima gradskih vlasti da neguju okruženje

pogodno za poslovanje aktivnim javnim djelovanjem, uspostavom poslovnih zona te razvojem infrastrukture.

Na sastancima sa gradonačelnikom, predsjednikom i potpredsjednikom Skupštine, te episkopom Fotijem i efendijom Camićem, ostao sam impresioniran koliko su posvećeni promoviranju tolerantnog okruženja te viziji zajedničke prosperitetne budućnosti.“